



# Tir Yimyim

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 3

Yangia anidakangma :

f Tir Yimyim

Instagram tiryimim@aolima

YouTube tir yimyim

TAPAK 7

Meghalaya Forest Minister James

Priyanka-i tetsürtem nem smartphones

Sangma-i online workshop nung jembitsü

aser scooty agütsütsü nangzük



VOL. XIX NO. 14 (ADOK 14)

DIMAPUR

ROGONÜ (FRIDAY)

MONGPUTENI (OCTOBER) 22, 2021

₹ 5.00

## State Level War Room on COVID-19 maneni alitsü

**Dimapur, Mongputeni/Oct. 21 (TYO):** State Level War room on COVID-19 ya tarutsü nung sangdong ka magütsü tashi Nagaland State Disaster Management Authority, Nagaland Civil Secretariat nungi mapa inyaka atatsü, ta Chief Secretary, J Alam-i sangdong ka nung metetdaksü.

State Level War Room ajanga data bendenba, ketdangür balala nem osang agütsüba aser State nung COVID-19 tensa asadangtsü

atema District Task Forces balala den osang-tsüsang agitepba maparen maneni Nagaland State Disaster Management Authority ajanga inyaktü, ta pai ashi.

Department of Health & Family Welfare, Department Information Technology & Communications aser danga department tem nungi ketdangürtemi maneni COVID-19 War Room website <https://covid19.nagaland.gov.in> nem metetdaksütsü aser online ajanga osang agiteptsü.

## COVID-19 Nagaland: Cases tasen 11, taneptsü angur 15 & asür ka liasü

**Dimapur, Mongputeni/Oct. 21 (TYO):** Tanü COVID-19 positive cases 11 putetba ajanga Nagaland nung iba tashidak agi meneper nisung 31,670 jungogo.

"Tanü COVID-19 positive cases 11 puteter ya Dimapur nungi pezü, Wokha nungi asem, Kohima aser Mokochung nungi ana-na alitsü," ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

Paisa, tesüiba ghonda 24 tsüngta COVID-19 positive alir nisung 15 - Dimapur nung 7, Kohima aser Phek nung asem-sem aser Mokochung aser Peren nung kaka taneptsü ngua state nung iba tashidak nungi taneptsü angur ajak agi nisung 29,717 alitsü, aser taneptsü anguba rate ya shilem 93.83 alitsü, ta ashi.

Tang state nung COVID-19 active cases 250 lir, aser item rongnung nisung 54 dak iba tashidak agi timtem sümia agütsüba lir, nisung 9 tera timtemer, nisung 7 kanga sashia kangshir aser nisung 180 dak temang nung timtem mali, ta pai ashi.

Dimapur district nung COVID-19 positive alir ka asüba ajanga state nung iba tashidak keter asür nisung

677 jungogo, aser item rongnung nisung 15 dak danga tashidak liasü, ta pai ashi.

Ajak senteper COVID-19 positive alir nisung 1,026 danga state temi ogo, ta pai ashi.

Tang tashinung COVID-19 tashidak alitsü temolung melemi Nagaland nung sample 389,226 tendangogo. Item ya RT-PCR ajanga 110,594, TrueNat ajanga 85,025 aser Rapid Antigen Test ajanga 193,607 tendanga liasü, ta Dr Kikon-i ashi.

Bodhbarnü tashinung Nagaland nung nisung 704,210 nem COVID-19 mozü doses 11,59,659 agütsüogo, ta State Immunization Officer, Dr Ritu Thurr-i metetdaksü.

State nung COVID-19 mozü agir alirtem ya frontline nung inyaker nisung 60,957, healthcare nung inyaker 15,998, arishi küm 45 nungi tema nisung 201,110 aser arishi küm 18 nungi 44 tsüngta nisung 426,145 alitsü, ta pai ashi.

Nisung 455,449 bo vaccine dose tanabuba agia parnok course ajanga tembangogo. Itemji frontline nung inyaker nisung 47,779, healthcare nung inyaker nisung 13,352, arishi küm 45 nungi tema nisung 154,184 aser arishi küm 18 nungi 44 tsüngta nisung 240,134 alitsü, ta Dr. Thurr-isa ashi.

## Keoshu Yimchunger state assembly nung züngsem kümogo



October 21, 2021 nü NLA Speaker-i Keoshu Yimchunger tenangzüktep agiba noksa nung angur.

**Kohima, Mongputeni/Oct. 21 (TYO):** Nationalist Democratic Progressive Party (NDPP) nungi tawa shimtetsang, S. Keoshu Yimchunger ya State Assembly nung züngsem ka ama Speaker Sharingain Longkumer ajanga Brehostibarnü tenangzüktep agiogo.

58-Shamator-Chessore Assembly Constituency nungi tasen shimtetsang, Yimchunger nem 'oath of office' ya Longkumer-i Assembly Secretariat nung aliba pa indang office chamber nung ketdangüa agitsü.

Sangphur yimtsüng nungi Yimchunger den tetokteper shinga

mali shimtetogo, ta Chief Electoral Officer V Sheshank Shekhar-i October 13 nü sangdonga liasü, kechiaser iba bye-election nung danga candidate katia tenung magütsü.

Yimchunger ya state nung opposition maliba sorkar, United Democratic Alliance (UDA) ajanga molunga shimtetba candidate ka liasü.

Iba tezüngzüktep agiba sentong nung NDPP nungi Advisor Mhathung Yanthan, BJP nungi Advisor Dr Longrineken aser H Haiying aser NPF nungi MLA Khriehu Liezietsu nungertem dena liasü.

## Police Commemoration Day nung police 14 nem tetushi agütsü



New Police Reserve Kohima nung October 21, 2021 nü Police Commemoration Day amungdang parade aliba noksa nung angur.

**Kohima, Mongputeni/Oct. 21 (TYO):** Linük tesem ajungalen Brehostibarnü Police Commemoration Day amungba mapang tasü tait police 377-i takum bendanga agütsüba atema konang tetushi agüja liasü aser Nagaland nunga COVID-19 tashidak pokteter frontline worker ama duty nung lia asüba state police 14 nem tetushi agüja liasü.

Iba anogomung nungtem nung Nagaland Deputy Chief Minister, Y Patton aser Director General of Police T. John Longkumer den cabinet minister tem aser police tanishirtemi New Police Reserve Kohima nung sentong agiba mapang akum agüja naro inokja liasü.

COVID-19 atema frontline worker ama inyakba mapang state police 16 asüba nungi nisung trok kinunger nem Deputy Chief Minister-i teyari ama (ex-grata) sen lakh ter (Rs 10 lakh each) amokja liasü.

Tanüngba police ti tenung tetushi agütsü aser parnok atema sorkari tekeratiba nung senotsü teyari agütsütsü.

Duty nung lia COVID-19 agi asüba Nagaland Police tem tenung yamai alitsü: 12th NAP IRB nungi ABSIS, Adem Pongen, FSL Dimapur nungi ASI Bangong Yanlem, 4th NAP nungi Hav Lipokmar Ao, 15th Mahila IR nungi Hav Rivitoli, 1st NAP nungi Hav Jabilong Zeliang, CP Dimapur nungi THC Seiduo Kuki, Legal Cell PHQ nungi Nk

Purnungba Ao, 4th NAP nungi Cnst. Vizo Angami, DEF Phek nungi ABC Kuosierho Nyuthe, 8th NAP nungi Cnst. Jiten Singha, DEF Kohima nungi Cnst (Dvr) M. Loyem Chang, 14th NAP IRB nungi Rc. Cn. Merenmenba Aier, MT PHQ nungi Cnst (Dvr) Santosh Kumar Patra aser 14th NAP IRB nungi Cnst (Mech) Dilip.

Iba sentong nung Deputy CM aser Minister in-charge, Home, Patton-i ashiba agi, "Takum kumzüka ayutsü temeden aser personal liberty ama nübürtem temeden wazüka ayuba nung police temi tongtipangtiba shilem agir, kong state amendaka lir."

"Ibai executive teka tashi taittiba lir, kong nübürtem tenzüka nung democratic government metaloka lir. Yimsüsüba tsütsü tejangja ajitetba tejakji ibai lir," ta pai ashi.

Tashidak wara poktetba sülen Ato Kilonser Narendra Modi-i taoba küm March 24 nü lockdown mezüngbuba sangdong aser iba sülen state sorkari Satate nung COVID-19 prokshia aoba azioktsü merangba maparen nung Nagaland Police züngsemtem den medical health worker tem yakbang sür inyaka arur, ta pai ashi.

State police temi shilem balala agiba kar lemsatepba mapang, khuret jenti liaka State nung police temi lockdown mapa tajungtiba nung inyakogo aser tashidak wara agi tesem ajunga sünger aliba mapang Nagaland Police-i "Law and Order" dak alia inyaka public health

tsütsüba shilem tasen agia liasü, ta Patton-i ashi.

Police temi akhi mapang nungi amshiba yimya aser mapa kisüng masü nübürtem asoshi alia inuakba atema Deputy CM-i pelaba lemsatepa liasü.

COVID-19 agi asüba police kinungertem nem teyari senotsü agütsüba yagi nisung takum ka samaba malangzükter, saka ibai state sorkari Nagaland nung aliba nübürtem tenung nung tepela temaitsü sayuba lir, ta pai ashi.

Tawa Khuzama nung Narcotic Checkpoint nung aliba police temi sen crore 22.78 jenjang ozüng alema shibelenba hon apuba atema Deputy CM-i tenüngsang agüja liasü.

Armed forces temi tasü ita nokdakba aser takum bendanga agütsüba ang bulua angashir, saka police temi tasü ita nokdakba aser bendanga agütsüba ya kasa tushitsü tim, ta pai ashi.

Police temi pei kibong, loktiliba takum aser sodi anogotem tesü südaksür nübürtem tiptema yutsütsü meranger aser iba ama inyakdang anogoshi lokti anemer, kiralongrar aser timtem agütsürtemi linük amokmerenba samadaksür aser bendanga agütsür mapa inyaker, ta Patton-i ashi.

Kasa sentong nung DGPT, John Longkumer-i jembiba mapang, linük wazüka ayuba maparen inyakdang takum linük nung police 377 takum samaogo, ta ashi.

(Maneni tapak 2 nung...)

## District Education ketdangür atema State Level orientation sentong agi

**Dimapur, Mongputeni/Oct. 21 (TYO):** Nagaland Education Project (NEP) - The Lighthouse kübok District Education ketdangürtem atema state level Orientation aser Sensitization sentong ka October 21, 2021 nü Hotel de Oriental, Kohima nung agia liasü.

Iba sentong nung shilem agirtem nem iba project indang tejangja angatetdaksütsü mechi sentong ya ayongzüka liasü.

Iba sentong nung state kübok district 12 prong nungi District Education Officers (DEO), Sub-District Education Officers (SDEO), EBRC coordinators aser Assistant District Coordinators (ADC) tem dena liasü.

Sentong nung nisung 108 arua shilem agi aser parnok ya district education ketdangür aser state project team tem liasü.

NECTAR project indang metetdaksüba mapang Shanavas C, IAS, Principal Director, Department of School Education

and Project Director, NEP ajanga NEP - The Lighthouse indang rateta ashi.

Paisa sentong nung adener dang tang tashinung iba project inyakyonga aruba aser terenlok aliba indang shia liasü.

Project Director ajanga iba sentong nung keta alibattem, result matrix aser programme tools angatetdaksü.

Razouseyi Vese, Additional Director, Directorate of School Education ajanga iba sentong nung tajungshi o jembiba mapang district officer tem dang iba project nung yakbang sür shilem agitsü ajungshi aser project takok angutsüba inyaktü ayongzüka liasü.

'Coping up with COVID 19 pandemic' nung Training of Trainers (ToT) session ka aliba mapang school nung iba tashidak nungji kumzüka alitsü aser azioktsü indang Dr. Longri Kichu, State Consultant, UNICEF (DH&FW) ajanga jembia liasü.

Iba mesükba COVID-19 indang

session ya school nung lenirtem asoshi block ajak nung EBRC office nung agitsü.

Training ya school sasep nunga agitsü aser yangji school staff tem atema training agir aliba school lenirtemi COVID-19 training agütsütsü.

Iba sentong kübok 2021 küm November ita tatem tashinung Government school 1990 aser tesayur aser non-teaching staff 20,000 dak tema awajemtsü nükjidong lir.

Johnny Ruangmei, OSD NSDMA ajanga 'School safety and Disaster Management' onük nung jembiba mapang school sasep nung Disaster Risk Reduction plan yanglua lendong ajema kumdaksütsü ashi.

Ano iba sentong nungsa Environmental and Social Management Framework (ESMF), sendaka aliba lokti tentet balala indang teinyaktü mapatem aser Information Desk amenoktsü indang jembia liasü.

## Dimapur nung Police Commemoration Day mungogo



**Dimapur, Mongputeni/October 21 (TYO):** Linük ajunga den jangyu medema October 21 nü Dimapur police-i CP office, Dimapur nung Police Commemoration Day mungogo.

Sentong nung o jembiba mapang Commissioner of Police, Dimapur, Rothihu Tetseo-i, 1959 küm October 21 nü Ladakh nung police patrolling party ka China nungertem sepaitem armmendanga atar maka police 10 tepsetba den kar pur aoba indang

bilemtetshia jembiba. Paisa, 1960 küm IGP Conference agiba mapang October 21 ya Ladakh nung pei taküm bendanga agütsüba police tem dang masü saka duty nung asüba police tem ajak bilemtetshia atema iba anogo ya Police Commemoration Day ama amungtsü telemtetba agi, ta ashi.

Rothihu-i taoba küm ka tsüngda linük nung duty nung aliba mapang police 377 süogo, ta metetdaksü. Iba den

bendenloksema Covid tashidak agi police 14 süogo aser asürtem rongnung Dimapur district nungi nisung pezü densema lir, ta pai ashi.

Kasa anogo general salute, CP Dimapur nem "Roll of Honour" agütsüba, "Roll of Honour" azüngba, Cenotaph, Shok Kar "Last post" nung "Roll of Honour" toktsüba, 'Reveille', SAMARAK KO SALAMI aser CP-i anir naro toktsüba amala sentong balala agiogo.

## District Level Implementation Committee senden amen

**Dimapur, Mongputeni/October 21 (TYO):** Unorganized workers tem anidentsü aser district balala nung item worker tem eShram portal nung züngoksemdaktsütsü atema District Level Implementation Committee senden ka October 21 nü DC Conference Hall, Kohima nung menogo.

Senden nung Deputy commissioner Kohima, Gregory Thejawalie-i, Ministry of Labour & Employment, koba India sorkar kübok ministry tem rongnung tejentiba ka lir, iba ministry yagi linük nung workers tem tejangraba kümzüka toktsütsü aser organized aser unorganized sectors naprongla nung parnok indang welfare ajungketja aser social security agüja Labour Force taküm aser merakat ajungkettsütsü atema inyaka arudar, ta ashi.

Paisa, Ministry of Labour-i unrecognized workers tem atema National Database ya yanglutsütsü atema eShram Portal ([www.eShram.gov.in](http://www.eShram.gov.in)) ya amenokogo, koba Aadhaar den sendakteptsü, kong tenüng, mapa, addresses, education, skill types aser kinungertem indang osang amala keta alitsü, ta ashi.

Iba amala mapa inyakerem indang employability angatetsü aser social security schemes ajanga agütsüba tajangzükttem parnok nem agütsütsü atema iba ya unrecognized workers tem asoshi mezüngbuba national database lir, ta DC-i ashi.

Kasa mapang nung Additional Secretary, Labour and Employment, Anthony Ngully-i ashiba agi, arishi küm 19 nungi 59 tsüngda alir shirnok unrecognized sector tem nung inyaka arudar, parnok eShram portal nung züngoksemtetsü, kong bendanger aayangertem, gig mapa inyaker, platform mapa inyaker, aluyimer, MGNREGA kübok inyakerem, angopurtem, mamatzü ayokertem, ASHA workers, Anganwadi workers, lendi nung yokyatsüyartem, kidang teyaritertem, rickshaw anishirtem aser unrecognized sector kübok iba amala mapa nung inyakerem, self-employed worker mesera unorganised sector nung aayangertem aser ESIC, EPFO nung züngoksema maliba organized sector nung mapa inyakerem aser sorkar mapa nung sodaka malirtem densema lir.

EShram portal nung

züngoksema tajangzükt indang jembiba mapang Assistant Labour Commissioner, Vikeluto Naki-i ashiba agi, eShram portal ya unrecognized worker tem atema centralized database ka asütsü, koba Aadhaar den sendakteptsü. Portal nung züngoksema sülen pa/la nem PMSBY kübok accidental insurance sen lakh 2 agütsütsü. Tarutsü nung jongdak mapang aser COVID-19 amala wara mapang iba portal ajanga unrecognized worker tem nem social security tajangzükttem agütsütsü aser database ya teyari atema amshitsü.

Paisa, eShram portal nung züngoksemtsü atema Aadhaar number; mobile number (Aadhaar den sendaka aliba number tajungba asütsü), Bank Account den IFSC nüngdaktsü, ta ashi.

Senden nung implementing committee züngsemtemi registration, enrolment aser mobilization sentongtem dak sendakba nung sensak asem aser Kohima district kübok yimtsüng nung telentem ajak densema Sub-division tem nung iba inyakyim indang tangazükba agütsütsü atema sentong ayongzüka agütsü telemtetba agi.

## Mkg nung Skill development training sentong ka agi



**Dimapur, Mongputeni/October 21 (TYO):** Jal Jeevan Mission (JJM) kübok Public Health and Engineering Department (PHED) Mokokchung Division-i ayongzüka Skill development dak sendakba nung basic training sentong ka agiogo. Iba sentong ya October 20 nü Sangtemla ward Community hall, Mokokchung jila nung agia liasü.

Sentong nung shisalen agütsür SDO PHED Mokokchung Er Imtiyanger T Imchen-i Jal Jeevan Mission (JJM) nükjidong metetdaksü, koba 2024 küm tashi nungbo kibong shia nema tajemtsü tzü temerek agütsütsü aser ki shia tonga tzü bener

arutsütsü atema lir.

Pai, department-i iba project ya yimtsüng ajak nung benoka inyaksü atema achayangtsü aser iba project dak sendakba technical tsütsü teyari agütsütsü, ta ashi.

Er Imtiyanger-isa, iba project mapang talangka benoka inyaksü aser anepalutsü atema WATSAN (Water and Sanitation) Committee den yimdaklirtemi shilem tongtibang agütsü lir, ta ashi.

Iba training ya water supply infrastructure tem mapang talangka amshitetsü aser yimdak yimtsüngtem nung hadirtem achayangtsü aser anepalutsü atema tenüngdakba tangazükba kar agütsütsü nükjidong nung

ayongzüka agiogo.

Training nung shilem agirtem nem electrification, plumbing aser masonry, welding system aser pumping system dak sendakba nung tangazükba agütsü liasü.

Training ya Pokti (Electrification), I Wati Jamir (Plumbing & Masonry), Yarenba (Welding system) aser Jongpongwati (Pumping machine system) nungeri agütsü liasü.

Training sentong nung Chuchuyimlang, Changtongya, Kubolong, Ongpangkong North & South blocks kübok yimtsüng 38 nungi nisung 80-i shilem agia liasü.

## SCERT-i textbook aliba nung teyari agütsütsü

**Dimapur, Mongputeni/October 21 (TYO):** SCERT, Nagaland-i sangdong ka ajanga, parnoki Academic session 2022 atema private school ajak asoshi Nagaland Heritage Studies Series (MIL) Classes 1-8 aser Nagaland Heritage Studies Series (English Version) Classes 5-8 textbooks aliba nung teyari agütsütsü, ta metetdaksüogo.

Iba dak sendakba nung

SCERT-i, Nagaland Heritage Studies textbook amshitsü mulunga aliba private school tem dang school tenügdakbatem October 30 nü tashi nungbo SCERT, Nagaland nem osang agütsütsü metetdaksüogo. Tongteprateptsü atema Contact no.s : +91 700 597 9687 / +918014893515 tem amshitetsü, ta kasa sangdong ajanga metetdaksü.

## Noklak indang landslide risk evaluation final report agütsü

**Dimapur, Mongputeni/October 21 (TYO):** October 20 nü DC Conference Hall, Noklak nung Department of Geology, Nagaland University-i Noklak jila indang landslide risk evaluation final report agütsüogo.

Sentong nung iba project indang PowerPoint ajanga osang agütsüba mapang Prof. G.T.Thong-i, Noklak jila pezüsü nung ka Kiam anentsüh agi kongshir, kong nüburtem aser parnok indang kiojentem lendong nung lir, ta ashi. Küm metsü dak tema Noklak jila aser nüburtem anentsüh agi timtem agütsü arudar.

Prof. Thong-i anentsüh aluba tera tatongi rasaa ashi. Pai anentsüh ya tectonic activity, earthquake, high precipitation, kilentsü shidak yanglua maliba aser anthropogenic activity ajanga alur ta ashi.

Jila ya disang rocks aser slope material (soil & rock Debris) nung amenoka lir aser ali 3-5m dang lir. Jila anüdoktip len tzünglu aruba ya timba anentsüh aluba tesem adener Kiamong ayongi yimoka aier, ta Prof. Thong-i ashi.

Iba project benoka inyakra nükjidong tongtibangtibaji Noklak nung anentsü aluba tesem indang ali aser long mechanical properties jangjatsü, Noklak jila indang landslide susceptible & risk maps yanglutsü aser anentsüh aluba nokdangtsü atema lenmangtem sayutsü atema lir. Bushitsüngdang asüba tesemtem nung long tashi maitba, longren asüba agi anentsü kanga bulua aluba, süngtonglitong peria maliba aser iba den bendenloksema tzü ayimba ajanga ta ngutetogo, ta Prof. Thong-i ashi.

Noklak jila nung anentsüh aluba nokdangtsü atema building code essential renemtsü/ yanglushitsü aser benoka inyaksü, anüdokleni jila atsülanga aotsü, awareness sentong

ayongzüka agütsü, kilentsü tajung yanglutsü benokogo. Report ajangsa ali tashi mait aliba nungkütem nung kiojen tulu meyanglutsü, anentsüh aluba tesemtem nung terenlok maparen kecha minyaksü aser jana aser talisa non bio degradable janatem kanga junga bendener intoktsü tetuyuba agütsüogo.

Maneni anentsüh aluba nokdangtsü atema teti asoshi jenjang agütsü, Kiamong ayong yima alulen kilentsü shidak yanglutsü aser velocity tajemba kümdaktsütsü aser ali anenba ajemdaktsütsü atema check dams yanglutsü tetuyuba agütsüogo.

Iba project ya Department of Geology, Nagaland University Kohima campus, Meriema kübok Dr. Temsulemba Walling-i Principal Investigator ama agizük aser Prof. G.T.Thong, Co-PI, Research Fellow Mademshila Jamir aser Nokendangba Chang Project Assistant liasü. Iba project ya 2018 küm June 1 nü tenzükt aser 2021 küm March ita atem.

Kasa mapang nung Prof. G.T. Thong-i, Noklak District Administration, Noklak Village Council aser Kiam Landslide Committee dang parnok teyari atema kanga pelaba lemsatempa liasü.

Senden nungsa kiamong anentsüh aluba tesem nung inyaka aliba Geology Survey of India nungi ketdangtsürtemi parnok inyakyim indang metetdaksü.

Geology Department of Nagaland University aser Geology Survey of India nungi shisalen agütsürtem pelashishia agizükba mapang SDO (Civil) Noklak C.Phuniang-i Noklak jila nung anentsüh ajanga timtem agütsüba indang metetdaksüba den project takok nung tembangba atema tenüngsang agütsü. Project report ya copy ka District Administration Noklak nem agütsüogo.

## Police Commemoration... (TAPAK 1 NUNGI...)

"Item tasü tait police nem akum agütsür. Ajidang masü tenük agi manguba tsükchir - COVID virus - den raraba mapang frontline nung nüburtem azioka lockdown ozüng mapa kuma inyakdang asüba police nem akum agütsür," ta pai ashi.

"Nagaland Police nungi COVID Martyrs 14-i bendanga agütsüba aser shilem agiba atema pela agizük," ta pai ashi.

Tanü ya mangyimba anogo kisüng masü saka police temi pei atema mebilemi takum bendanga agütsüba tanüla aliba benjunga anogo ka lir, ta DGP Nagaland ajanga ashi aser 'uniformed personnel' dang nüburtem tenzüktü atema tezüngzükttem agiba tasen kumshitsü ayongzüka liasü.

Kasa mapang COVID dak sendakba mapa inyakra mapang asüba Nagaland Police ajunga nem State sorkari senotsü teyari agütsütsü sangdongba atema pelaba ashi.

"Iba ama mapa tajung inyakra ya kodanga mamadoktsü," ta pai ashi.

Ganeshnagar nung 1500 bedded quarantine center amenoka ketdangtsüba asoshi Nagaland Police dak tali tamang akar, ta

Longkumer-i ashi.

State nung quarantine center ibai tulutiba liasü aser otsü yanglua mapang tatsüka tsüngta yangji inyakyim tenzüka liasü.

Ano 100 bedded COVID hospital ka terenemlen lir aser temeket nung oxygen plant inoka lir, ta DGP-i metetdaksü.

National Police Commemoration Day ya küm shia October 21 nü amunger. 1959 küm China nunger den raraba mapang police ter takum bendanga agütsüba nungtem nung iba anogomung ya amunger.

Iba anogo DCIO Karam Singh-i aniba CRPF Mobile Patrolling Party ka Ladakh kübok Aksai-Chin area nung atsüka atar amakdang parnok ter tepset aser tanüngertem ya pua bener ao.

Asürtem temang ya China nungeri November 13, 1959 nü agütsü aser November 14 nü Ladakh nung feet 16,000 tur aliba Hot Springs nung arem.

1960 küm India kübok State ajunga nungi Heads of Police tem mungdang ka aliba mapang October 21 ya India tesem anungalen Police Commemoration Day amungtsü lemteta liasü.

# Assam: Tetsür chanu ka tepsetba atema tebur chanu asem apu



Watch on YouTube

**Guwahati, Mongputeni/ October 21 (Agencies):** Arishi kum 6 tain tetsür chanu ka tepsetba atema Nagaon Police-i tebur chanu asem puogo. Tebur chanu asem ya ana arishi kum 11 aser ka arishi kum 8 lir. Tetsür chanula yagi parnok den porn repringtsü nongnangba atema tepset, ta osang ajanga metetdaksü.

Iba tatalokba ya Hombarnü nikonngtsüsü Assam, Nagaon district kübok Mathaukhat tesem nung ataloka liasü.

Arishi kum 6 tain tetsür

chanula indang tasü mang ya Hombarnü nikonngtsüsü lar ki anasa aliba Bajrang stone quarry nung ngutet. La tasü mang ya longtepdak toilet indang tank nung inoktsür liasü.

La temang nung tesem aika nung hadir techira agi tarak kettsüba ngutetogo.

Nisung tepsetba dak sendakba nung Nagaon Police-i Bodhbarnü arishi kum 11 tain tebur chanu ana aser arishi kum 8 tain tebur chanu ka apu Police-i ken o bushisü ngdangba sülen tetsür

chanula yagi tebur chanu asem den ya porn videos repringtsü atema nongnangba atema tepset ta ngutetogo.

Tebur chanu asem yagi Hombarnü tetsürlar ki anasa la nem kangshia porn videos repringdaksütsü merang saka lai memulungba sülen parnok i la tepset.

Police-isa, ken o jangjaa aliba sülena police den teka amteper minyakba atema aija alir rongnung ka indang tsürapura dena puogo, ta metetdaksü.

# Meghalaya Forest Minister James Sangma-i online workshop nung jembitsü

**Shillong, Mongputeni/ October 21 (Agencies):** Meghalaya nung lipuküm/libajen kumzüka ayutsü aser terenlok lidaktsüsü atema mapatong balala achaayangba sülen, online training workshop ka nung tongti o jembir ama Forests & Environment Minister, James Sangma jaokogo.

'Northeast Narratives' ta nungja agütsüba workshop sentong ya October 22, 2021 nü Down To Earth ajanga ayongzüksü.

Linük nung tzü mopung melenshiba, koba ajanga Northeast tesemtem nunga konghshio, item onük dak sendakba nung ajemdaker, iba workshop nung Meghalaya forest minister James Sangma-i Northeast State ajunga nungi osangbener (journalist) aser media tentet

balala den jembitsü. Iba mapang, James Sangma-i, Meghalaya indang libajen/lipuküm tebilemstü onük tongtibangtem aser asen meküta aliba libajen kumzüka ayutsü asoshi lisopurtem den forest & environment department longjemer asalentong tem yanglua mapa kuma inyaksü indang metetdaksütsü.

"India nung tesem timbaka nung tzü mopung melenshiba ama, Northeast nunga tzü mopung melenshiba aoba ajanga timtem tulu adokdaksüogo," ta James Sangma-i ashi.

"Tesüiba kum ishika tejakdang nungi tzü mopung melenshiba ajanga iba tesem (Meghalaya) nung tzü mopung tatsükba akümer aser tzunglu peria marur, koba ajanga

aluyimba dak kongshir aser nüburtem taküm nung timtem adokdaksü," ta pai ashi.


James Sangma-i Northeast nung tzü mopung melenshiba aoba indang tebilemstü aser iba timtem aziüoktsü/lenmang ka bushitsü atema Meghalaya-i asalentongtem yanglua item tasa mapa kuma inyaksü indang jembitsü.

Iba workshop ayongzüker temi, tzü mopung melenshiba ajanga State nung timtem balala adokdaksüba aser nüburtem iba tensa ajanga tetsükdaksü adokbatem dak sendakba nung osangbener aser media dang tekümdangtsü osang sangoktsüsü aser parnok dang tzü mopung melenshiba aoba indang metetta lidaktsüsü nükjidong nung online workshop ayongzüker, ta ashi.



Assam kübok Nagaon district police-i, Raha temeket nung aliba Chaparmukh Railway Station nung sen lakh 85 alang heroin puogo. Iba dak sendakba nung tetsü ka densema nisung pezü puogo. Temesepba mozü shibelenerntemi heroin ya Dimapur nungi Ledo Express nung bener aru ta Nagaon police-i metetdaksü. Aija alirtem ya Sitara Begum, Ainul Haque, Rasidul Haque aser Wadikul Islam ta jangjaogo.

**Piles Anepaluba** - H. Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajiuaka, tang **H. Umar Chesam contact no. 9863758600 / 8416087414 National awardee H. Umar Chesam** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Aponi Lotha, Add: 4th Mile



# Mizoram nung Covid-19 tashidak maneni prokshia odar

**Aizawl, Mongputeni/ October 21 (Agencies):** Mizoram nung taoba ghonda 24 tsü ngda Covid-19 tashidak nisung 741 dak potetba den nisung ka süogo.

Nisung ka asüba sülen Mizoram nung Brehostibarnü tashi nung Covid-19 tashidak agi asür nisung 396 jungogo.

Brehostibarnü tashi nung state indang positivity rate 8.97% liasü.

nungi 5935, Lunglei nung 902, Siaha nung 576, Champhai nung 575, Kolasib nung 295, Serchhip nung 785, Lawngtlai nung 484, Mamit nung 463, Khawzawl nung 44, Hnahthial nung 156 aser Saitual nung 48 lir.

Tashidak potetertem ya Zoram Medical College (ZMC) laboratory nung RT-PCR test ajanga nisung 125, TrueNAT test ajanga nisung 43, RAgT test ajanga nisung 558 aser FIA ajanga nisung 15 dak tashidak poteta liasü.

Mizoram nung ajak senteper nisung 1,15,207 dak covid tashidak potetogo aser tang nisung 10,263 tashidak menar temang anepalu tesü dak lir.

Mizoram nung tang tashidak menar alirtem ya Aizawl district

Directorate of information & public relations, Mizoram-i Bodhbarnü nikonngtsüsü 5:00 ako nung sangdongba health bulletin nung nisung 708 taneptsü anguba metetdaksüogo.

Tashidak anepertem ya Aizawl nungi 502, Hnahthial nungi 56, Champhai nungi 43, Lunglei nungi 34, Mamit nungi 34, Kolasib nungi 24, Lawngtlai nungi 15, Khawzawl nungi 1 aser Saitual nungi 1 densema liasü.

Bodhbarnü Mizoram idang recovery rate 90.87% nung liasü.

Bodhbarnüsa Mizoram nung nisung 665 dak Covid-19 tashidak potet aser nisung ana asüba metetdaksüogo.

# Assam : Central Team kati teraksatsübatem asadang

**Guwahati, Mongputeni/ October 21 (Agencies):** Assam nung tzümetsüng aser anentsüh amala lendong balala ajanga teraksatsüba bener arutsüba asadangtsü atema züngsem tenet agi kümtetba Central team ka Bodhbarnü Assam tonga aruogo.

Ministry of Home Affairs (MHA), Joint Secretary Manish Tiwari-i aniba team yagi Bongaigaon, Chirang aser Lakhimpur district tem semdanga kiojen aser libaliro raksatsüba asadangogo.

Assam State Disaster Management Authority (ASDMA)-i ashiba agi, state sorkari Centre team dang teraksatsübatem yanglushitsü atema sen crore 1088.19 agütsüsü mepeshia

asü ngdangogo. "State sorkari centre tem dang taküm tzümetsüng agi teraksatsüba balala bener arutsüba yanglushitsü atema National Disaster Response Force (NDRF) nungi senotsü agütsüsü atema asadangtsü mepeshia asü ngdangogo," ta ASDMA sangdong ka ajanga metetdaksü.

Maneni state sorkari centre team dang anentsüh aluba ya State Disaster Response Force (SDRF)/National Disaster Response Force (NDRF) küboki aiddaktsüsü mepeshia asü ngdanga liasü.

Team-i state ketdangsurtem dang report den tinyaktsü maparentem densema India sorkar nem agütsüsü, ta tenangzüka agütsü.

# TMC-i municipal polls atema nüburtem den tongteptsü sentong yanglur

**Agartala, Mongputeni/ October 21 (Agencies):** Trinamool Congress Tripura unit-i state nung taruba municipal elections magi tsü ngda nüburtem den tongteptsü atema sentong yangludat. State nung Assembly election agitsü kum ka ser tesadang lia iba sentong ya benoka inyaker.

TMC indang Tripura unit züngsemtemi iba sentong kübok state nung aliba block ajak sendanga nüburtem den ajuruteptsü. Trinamool Congress-i tawa shimba Rajya Sabha MP Sushmita Dev nem Tripura achaayangtsü nongloksüogo. Dev, shiba taoba mapang All India Mahila

Congress tir liasü, la taküm August ita TMC nung denogo.

"TMC-i taruba municipal elections temulungdang yur Tripurar Jonno TMC sentong ya tenzüksü. Onoki block ajaki oa nüburtem den ajuruteptsü. Onok indang youth committee züngsemtemi nüburtem semdanga parnok tebilemstütem angadangtsü," ta Dev-i ashi.

TMC-isa, covid wara pokteter aliba ajanga Section 144 benoka aliba anema parnok inyaksangshi masütsü ta shiogo. "Onoki iba sentong ya anogo 10-12 shi inyaksü. Onoki Tripura nung BJP-i tashiyim amshia inyaksangshiba anema longkak aitogo," ta Dev-isa ashi.



# TIR YIMYIM

## YIMOBILEM (EDITORIAL)

DIMAPUR ROGONÜ, MONGPUTENI(OCTOBER) 22, 2021

### Azü nem shi nükdaktsür !

**T**awa Dimapur nung lokti tentetemi aremer maremtet, Nagaland süngküm (gate) nung linük tenzükertemi dang masü saka mitkartemi dena tangalen nungi aruba khu abenba garitem dang sen meshiba ochimashi aser ozüng raksaba mapatem anema ola adokba sülen, tang ano Hornbill Tv osangbener ajanga Nagaland gate nung policetemi khu abenba garitem dang sen meshiba mapaten noksa dena tangoka yimjak nung sayuba mapaji nübortem ajangzükdaktsüsü asoshi nüngsen aser timtem aika tizükteta inyakba mapa tajung ka asütsü. Ashiko, Nagaland nungbo yimya dangji, iba tv osangjia Naga nung nübortemibo repranger odang toktsüsü, kechiyong Naga nung nübortemibo nübortem akoksadaksüba ochimashi mapatem ya bushisüngdanga nokdangtsüba mapa ya nübortem mapa masü saka ajia osangbenertem dang nungiang imlatsü. Ashi, tanga lima ka nungbo iba ama osangji osang kakat ka nung tera züpeta ka dang adokra mesüra tv osang nung teraka süia oa sayuba ngura, idangjisa nübortem adenshia ola adoktsü. Iba ola tsübuba jagi pei lima nung ochimashi mapatem aika nokdang. Ajisüaka, asen lima nungbo RTI ozüng amshia inyakertemia, nübortem anema ochimashi mapatem inyakba mapatem indang yimjak nung metetdaktsüaka shingaia zak-a masür. Tetezü, government nung mapa meinyak ser sen agizüka agiba aser nübortem meyong nübortem ket matong ser agizüka agiba mapatemji tim danga ta nübortemi bilemer südi. Ibayongji, Nagaland nungbo koyaia dena nübortem nüken metsübu kümogo. Ibayongji, Nagaland nung government ali kimong aser interstate check post reprangtsü aser anüktsü atema ketdangser tulurtem aser mitkartem yokba ya azü nem shi nükdaktsür amai dang lir. Aji oda, anepalurtemi anir Nagaland government ali kimong atsüngsepa agiba aser tanükertemi anir Inter state Check post nung khu abenba garitem dang sen meshiba mapatem ya nokdangtsü asoshi ano tanükertem kar kanga nungdaka kümogo. Tesüngmangtsü Nagaland-ji ibai lir. Majunga asüyonga koyim limaa tanükertem anüktsü asoshi ano tanükertem nungdakba limabo malitsü. Hornbill tv osangbener dang khu abenba gari anishirtemi ashiba amaji, Assam tsütsü nungi khu abenba gari Nagaland artsü adena ait dang süngküm nung Nagaland police, Dimapur Municipal Council aser Excise purtem nem dena sen agütsüsüsa akümer aser item ajakji meyokteper gari shia Nagaland gate ajangba tenüng nung sen meyirijang pungo ser noklang pungo gate ajang shia agütsür. Talisa, kisüjensüba osettem yin aser cement abenba garitem nungbo sen meyirijang aika agütsür aser itemji dokan nung alidang asenoki memeteti menoktsür. Aji oda, Nagaland gate nung antsü shia sen ana agira, dokan kiburi antsü shia sen anaji temloker sen ter yong ayoker, anungji ashiko tayoker asoshiho talilaang tajangzük ngua alitsü, saka gate nung sen ana agütsüba sento asenoki dokan nung dokan kibur nem agütsür. Iba ama timtem aliba agi, Nagaland-i bener aruba yin aser cement Dimapur matongdang Kakhati nung godown tululu yanglur ayur. Aji oda, Kakhati nung yin load ka aliba o kasa yin load-ji Dimapur nung aliba na tsüngda sen meyirijang tenem shi ittepa lir ta ashir. Iba kasaji cement nunga asen nisungtem jagi süngküm nung asenok nem atongtsür. Ya koda asütsü ? Nagaland nung auer, ochimashir aser rakzükratemer iner meinpu, merila asünunga zükseter mezüksetma meinperong tulu lir. Ya kechi agi ? Asenokbo Nagaland gate nung saruba agi kibong mesütsü na ? Tangar khu abenba gari shia nungi saruba sen agi tanurtem züngdaktsüsü na ? Nübortem belemdaktsüba sen agi ki yanglutsü na ? Tangar dang rakzüka sen agi hon zük alia azüker senzütsü na ? Sensakertem nem dokan nung menokdaktsüba sen agi aliba gari nung mulung anisüngzüka mener jajatetter na ? Asenoki ngua asenok akoksatsüsa yimti süngküm nung mitkartemi anir rakzükratema mapaji odang toktsüsü na ? Khristan limai aيتدang "Welcome" sign board tsüngdang oset shia sen meshir yokbaji osang tajung (gospel) ji asü ? Atangji, asenok nübortema azübo azüsa, saka azü tamachila. Auer ashir aruagi kibur dak mapa tamajung inyaka angoyonga masanger. Ya kechi agi tamataridaktsür ? Asenokbo tamajung anema ola adoktetsüsa Tsüngrem dang imlibilema onok nüchi kümjang ta shidi.

## OLEMSABANG

### British sorkar mapang NAGA HILLS nung Gaonborah (GB) aser Dobashi (DB) tenzüksüba

~ I. Shilu Jamir (Dimapur)

"The History/Cultural of Ao NAGA" by PF. ADAMS SQN ICS Subdivisional Officer, Mkg 1939-1941

Iba kaküt nungi tatsüka agizüka lemsateper.

1. British sepoy Naga Hills 1846 küm tonga arudang Bagchan Darugai anir Engraji nung sepoytemi ASALU nungi Samaguting belener arua Police station ka yanglu.
2. Samaguting ali tesem tarok mopong majungba agi Colonial Keating mapang alima tiyongtsü repranger Kohima 1878 nung Political HQ yanglu.
3. November 22, 1879 nung British sepoytemi Khonoma nung den yimjung yanglu aser iba anogo nü jisa British sepoytemi par yimer rong nungi Gaon borah (Village Headman) ka shimteter Red Blanket ka agüja toktsü. 1881 nungbo Naga hills ji Engraji nung yimsüsüba nung züngsem.
4. Iba sullen alinük tesem ajak jungjunga repranger kelen Mkg nung sub division office lapok. Mr. Damant DC aser Mr. Hinde SDO Mkg mezümpur Engraji sahib liasü.
5. Tamasa küm ishika Ao lima ya Kohima aser Wokha sahib temi dang repranga liasü ta ashir.
6. Mokochung sahib mezüng DC Damant aser SDO Hinde sullen ano DC Major Michel aser SDO Fasson aru aser ano yamaji parnok den sahib aika DC 53 aser SDO 36 tashi melentepa 1841 tashi Engraji sahibten liasü, DC dang Borah sahib SDO dang Jodo sahib ta sa aja ta ashir.
7. Tongtipangsa Mr. & Mrs. A.W. Diwas DC Mapang leptep tsüngtep (Head Hunting) jungjunga anendaktsü aser pabo 5 ben tashi Mkg DC inyaka arua liasü ta ashir.
8. Ao lima nübur rong nungia yimtsüng sasep shia nungi Gaonborah shimmer Tatartem den aser Engraji sepoytem den yaritepa Government aser nübur sentong tem takok nung inyakteta ao aser GB ten küm shia Red Blanket agütsür, tetezü nübur khuret abenerten temaitsü ta ashir.
9. Naga nübur aser Bristish Government sepoytem O meyipa ano maparen ajak tongtepratepa nungittsü parnoki nübur rong nungi techira oshi oben, wainshintekümtet tekümdang nübu tajung kar shimteter parnok den yariteptsü aniok iba dangji Dobashi ta jatsü. (Do-Basha, Two language) ta ashir.
10. Naga Hills nung British Government-i Aor rong nungi Dobashi Mr. Temshimangyang Longkhüm, Father of Senkalemba (BEM) mezüngbuba shimtetba otsü kaküt nungji jungjunga zülua kar aser Red Waist Coat ka semlokja pa aniok ta ashir. Do-Basha (Two language) oshi ana asem tsüngda/tiyong nung O meyipa belena angatettepdaktsür tenüng tulu tapet parnoki jatsüba aser yamaji tashi (authority) nungloktsü ta ashir.
11. Kümtem süia aodang ano yamaji yimtsüng nübur rongnung Gaonborah aser ano nübu tajung repranger parnok teyarir tenyar Dobashitem shimteta inyaka Engraji sahib/Babu aser sepoytem denji yaritep aser DB nem lumpsum sen agütsü.
12. Iba putu tensa Engraji sahib nung den office babu temji Bengali Assamese nungertem dang liasü anungji DC sahib dang Bor saab, SDO sahib dang Jodo saab tasa aja.
13. Alemli tejen putu asen Naga lima arem min telung nung leptep tsüngtepa yim maktepa shiruru yimya nung ammag tiya nung lia alidang lemag malidak England lima nungi arua tetsüng agi jaja asen nübur nuji kümdaktsüba aser ano mezüngben British sorkari GB & DB post yanglua (post creation) maongkha tulu yutsüba peladi aser iba "Nüngyu mapa" akhumtsüba beshidi ta ayongzüker.
14. Iba den kükemi külen Engraji yimli Kohima, Wokha ta len nungi arudang E.W. Clark, ano külen Yisu tesangwa metsü America lima nungi bener aruja ajuruteper asen Naga lima nüburtem shiruru mesükba jenjang nungi iba tashi tanü tiya jenjang ajungkettsüba parnok aser Tsüngrem nem tenüngsang tulu agütsüdi.
15. Küm 200 shi jakdang "England yimli nung anü kodanga malur" ta jembiba putu tensa ka nung par England yimli nung asen Naga lima züngoksemtsüba maongka ulura ta züngshidi aser peladi. Naga nübur asoshi GB aser DB tem Tsüngremi moajang.

#### Note:

Iba ocet ya item book nungi agiteta zülur.

- a. The History/Cultural of Ao Naga (Page 19-27).
- b. WB Senkalemba BEM Book (Page 5,6). (BEM-British Empire Medal)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Karnataka nung Khristantemi anti-conversion ozüng anema nokdaker



Tawa Karnataka nung Khristan putirtemi Chief Minister, Basavaraj Bommai den senden amenba mapang tangokba noksa nung angur.

**October 21, 2021:** India kübok Karnataka state nung sorkari anti-conversion ozüng ka benoktsü atema jembiba mapang nung Karnataka Region Catholic Bishops Council (KRCBC)-i iba ozüng anema ola adok tenzüko, ta International Christian Concern (ICC)-i metetdaksü.

Tawa Karnataka nung BJP lenirtemi state nung anti-conversion ozüng benoktsü atema jembiba den külemi Khristan missionary tem anema bushisüngdangtsü tuyua liasü.

State nung Khristan putirtemi shidi ka ajanga Karnataka Chief Minister, Basavaraj Bommai dang, "India nung nüchiso anguba mapang nungi tenzüka tang tashi Khristan nütsüng marener, ajisüaka yimtenren party kari yimtenren nükjidong ataloktsü atema iba bill benoktsü meranger," ta metetdaksü liasü.

Taoba hopta Chief Minister Bommai densema yimtenren lenirtemi, Karnataka nung anti-conversion ozüng ka benoktsü tebilemba lir, ta sangdonga liasü.

Iba sülen anogo ishika dang lir BJP MLA, Goolihatti Shekar-i, Karnataka nung ozüng alema Hindu nung aika Khristan yimsü dangi meyipdaksüdar, ta tai tongloktsü.

Karnataka Region Catholic Bishops Council (KRCBC)-i Chief Minister dang, "Assembly nung iba ozüng ya benoka agizükra ibaji ajanga tamangba lokti tsüngda timtem adoktsü aser ibaji mazüoktettsü. Yimsü alia amangertemi iba ozüng nungi maongka agia pei ket nung ozüng amshitsü ta onoki tsübu bilemer," ta metetdaksü.

"Iba dak alia Karnataka nung Backward Classes & Minorities Welfare Committee-i Karnataka nung official aser non-official Khristan missionary ajak anema bushisüngdangtsü tuyuogo. Kechi nükjidong nung bushisüngdangtsüdar onoki mejangja, ajisüaka ibaji ajanga anti-conversion ozüng pusemstü ta onoki bilemer," ta Khristan putirtemisa metetdaksü.

Tawa Karnataka Backward Classes & Minorities Welfare Committee senden amenba

mapang nung Khristan missionary tem anema bushisüngdangtsü atema lemtet. Iba senden nungji BJP MLA Goolihatti Shekar densema MLA aika aden. Senden nung jembidang BJP MLA, Shekar-i Khristan missionary tem ajak registration agidaksütsüla, ta ashiba den külemi state nung Arogo shilem 40 bo unofficial Arogo tem lir aser state-i recognize masü, ta metetdaksü.

Kasa senden nungjisa committee züngsemtemi Hindu yimsü toktsür Khristan yimsü dangi meyipertem nembo sorkar teyari balala magütsütsüla ta jembi.

India nung linük temzüng Arrla 25 ajangabo pei melungba yimsü agizüktsü, beshitsü aser pei yimsü proktsü atema senso ajak nem temeden agüja lir, ajisüaka tamangba yimsü meyipba nokdangtsü atema state aikati anti-conversion ozüngtem benokogo. Iba dak alia Khristan mesüra Islam yimsü dangi meyipertem nembo sorkar teyari balala magütsür aser loktiliba nung sendoker.

## United States-i Afghan nung Khristantem mesendoktsüla: ICC

**October 21, 2021:** Taküm US sepaitemi Afghanistan toktsür aoba sülen August 31 nungi tenzüka Taliban yimsüsüba kübok Afghanistan nung rongsenkettsüng jenjang tamajungba akümba den külemi anogo shia tetsürtem aser Khristantem densema minorities kanga reshikangshir aser aika tepsetdar, ta International Christian Concern (ICC)-i metetdaksü.

Iba ama atensa ka nung United States aser alima linüktemi Afghan nung Khristantem mesendoktsüla, ta ICC-i metetdaksü.

Iba linük nung kiralongra aliba dang masü saka Afghan nung million 18 nungi million 14 bo ayawara tia nung lir; iba dak alia bank aika nung sen makai kumogo, ibayongji Afghan nung aikati pei meyong osettsüset ayoker.

Osang angazükba agi, taküm Afghan nung rongsenkettsüng shilem 30 tajemba akümtsü aser ibaji ajanga refugee tebilemstü

ano tuluba akümtsü.

Bandang linük balalai Afghan nung senotsü agi yaria liasü saka Taliban-i yimsüsüba tenzüka sülen linük rongsenkettsüng jenjang kanga mejungi kumogo. Tesüiba küm 20 tsüngda US kijaia Afghanistan nung sen billion 4 jungnüa indokogo.

Tawa G20 linüktem nungi lenirtem ajurua Afghan nung tebilemstü onük atema jembio aser iba senden nungji züngsem linüktemi Afghan refugees agizükba linüktem aser refugees yariba organizations nem dollar sen billion 1.2 agütsütsü lemtetogo, ta ICC-i metetdaksü.

Akhidang nungi Taliban teloki meimchir temeden anema inyaka arur; nisung puer aoyer, tashiyim amshia tetsür taküm raksatsür aser Khristan tsürtem kangshia Islam yimsü dangi meyipdaksür.

1990s mapang Taliban yimsüsüba kübok tetsürtem nem shisaliok magütsü mesüra

kinüngbu medenibo kimai ayazüka meyoki liasü. Iba dak alia Taliban-i television aser media densema lenla aika nung tenokdangba benok aser meimchir temeden balala anema inyaka aru.

Afghanistan nung Khristantem maneni reshikangshir. Taoba ita nunga Afghanistan nung Serving in Missions (SIM) nung inyaker ana - Siegbert Stocker (69) aser Willi Ehret (59) na tepsetba tasümgang September 5 nü ngua liasü.

G20 senden nung alima nung Islam lenirtem aikati Taliban-i nangzükba ama meinyaker, ta nangzükogo.

ICC Director of Advocacy, Matias Perttula-i, "Taliban teloki nangzükba ama meinyaker, anungji United States aser alima linüktemi Taliban anema inyaksüla aser Afghan nung ajak nem meimchir temeden agütsütsü atema Taliban telok ajungshitsüla," ta metetdaksü.

## ANO GO ABEN TSÜNGREM DEN

### Ne tesangwa tali tesangwa akümer asü ?

Saka temeshpur lenmangji anüpfung sangwa ama lir, kobai anüngdang matong tashi, tali sangwar.

A. Shin 4:18

Apijemtsü Shin kaket zülur, Solomon shisa takatiba chuba liasü. Iba shisatsü kaket yagi temeshi taküm aliba tajangzük lemsateper aser shisa taka tamashi nisung den medemdanger aser temeshi nisung temenen nisung den medemdanger. Yangi pai ashir, "Tashi temetet tetenzükji ya; Tashitemetet nguang; aser nai kechisa ngudir nguaka tangatetba nguang" (t.7). Pai ashiba tetezüji kati shisatsü, pai/lai ibaji maka aser aji pai/lai nüngdaker ta angatettsüla. Tamajung pur lemangji amang mesüka lir saka temeshi pur lemangji tesangwa lir (t.19). Nai anepdang anü adokba reprangra, idakji tamang lir, kodang züngya kümdir tesangwa tera yaloktsü aser anü jangja adoktsü aser anogoji maneni tesangwaba, tesangwaba akümtsü.

Iba amaji temeshpur dak ataloker. Atangji asenok shinga pei sasa temeshi mekümtet, saka nai aser ni Kibuba Yisu tenüng nung jara, asenok Pa temeshiba akatsü. Asen mera shiaji tejangjaba akümtsü kechiaser asenok lemang nung Pa asenok den jajar, asenok taküm anir. Timtem tuokrong tia ajanga Pa asenok den lir ta asenoki metet aser Pai asenok asoshi tajungtibaji bener arutsü. T. Ken 119:105 ji bilemtetang, "Ne O kü tsüng asoshi milen, aser kü lenmang asoshi tesangwa lir." Asenoki Pa O asenok taküm nung mungdaksüra asenok koda temulung süa alitsü.

Oba, tanü kü tesangwa agi Na tushitsü aser sentsüwangshidaksütsü kü dang yariang ta mepishir. Amen.

## BJP MLA kati Khristan aser Muslim nung anema jembi

**October 21, 2021:** Bharatiya Janata Party (BJP) lenir kati Hindu nung dang Hindu yimsü aser sobaliba wazüka ayutsü atema Khristan aser Muslim nung dang nungi pilaa alitsü, ta jembiba sülen yimsü lenirtem aser yimten lenir aikati pai jembiba oji aitsüogo.

Bhopal nung Dusshera benjung sentong ka nung jembidang Madhya Pradesh assembly nung züngsem, Rameshwar Sharma-i Khristan aser Muslim nung anema jembia liasü.

Sharma-i jembiba oji October 17 nü social media nung prokshiba sülen opposition Congress party-i BJP dang MLA kati jembiba oji jangjashijang, kechiyong item ama oji ajanga tamangba yimsü nung ajemdaker loktiliba nung telemsa adokdaksütsü, ta aitsü.

State yimtiba, Bhopal nung tongti putir, Leo Cornelio-ia, "Lokti sabang ka nungi yimten yimsüsür kati Khristan aser Muslim nung sendoktsü atema jembibaji ajanga nüburtem tsüngda telemsa adokdaksütsü," ta metetdaksü.

Osangbener den jembidang Leo-i, "Item ama o jembibaji ajanga yimjung meimertem melungjang yirutsür. Osettsüset jenjang atuba, mapa manguba, tashidak wara balala aser ayatzüra ama tebilemstü onük aika toktsür item ama o jembibaji ajanga nisung melungjang yirutsür," ta aitsü.

Paisa osangbenertem dang, iba ya loktiliba nung tesempa adokdaksütsü aser tesünep raksatsütsü nükjidong nung jembiba o lir, anungji item ama shisa tamajungji sendoktsüla, ta mepishi.

Madhya Pradesh Catholic Arogo nung public relation officer, Maria Stephen-i BJP MLA dang nübur ajak kibong ka ama züngshitsüla, ta metetdaksü.

Muslim nung lenir, Maulana Umar Quasmi-i, "Iba ya loktiliba nung telemsa adokdaksütsü nükjidong nung jembiba o ka lir. Sharma'er party-i Muslim aser Khristantem anemer, ibayongji parnok sempadaksütsü nükjidong nung item ama o jembi," ta aitsü.

**OLONG PAITEP # 5973**

1				2					3
						4		5	
6			7						
					8		9		10
11									
12		13					14		
		15							
					16				
	17								
					18				

<b>TIPIEN</b>		<b>LANGTSÜNGLEN</b>	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kakat ka - (5)		5. Tsüngremi mezüng pokeddaksüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

**OLONG PAITEP # 5972 TELANGZÜBA**

<b>TIPIEN :</b>	<b>LANGTSÜNGLEN :</b>
2. Pongsen, 5. Lepko, 7. Omen,	1. Alimang, 2. Pongen, 3. Samaru,
8. Maongka, 10. Yangkhu,	4. Nün, 6. Pio, 9. Nüngdak, 10. Yongya,
12. Senpong, 14. Angu, 15. Raksa,	11. Kongro, 13. Ora, 14. Ata.
16. Arameso,	



**DURGA PUJA TEMMER ALOKBA AROGO NUNG TATOK NANGZÜKER**

**Pastor** : Alokba na kechi aibelenba ajanga arogo nung nangzüker ?

**Alokba** : Küm nungi küm arogoi revival-a mayunger tenla sa aika abenyunga süngo a kena mejemdaksür ta asüba agi chia jemer jangratema tsüngsangnüba agi ano parnok ki tonga tayungi aruba agi puja nung oa atenba atema tatok nangzüker.

**Pastor** : Süra ya sürbo tangar benjung daki maotsü südi?

**Alokba** : Arogoi arung ta ki tonga tayongi arua, küm nung ken anabenbo revival nung jangra tema tsüngsangdaksüra, arogo nung tatongoker dang masü ni ama kinük nisung dena temeim lemsatepra, kinünger yimtsür yimer kin kidong masara, ochi dang ochi jatetra ni shidak dang alitsü nangzüker.

**Pastor** : Süra aji shiba dang nangzüker ?

**Alokba** : Tsüngrem aser arogo tsüngdang nangzüker ago saka na! aji Pastorba nenoki amongnü raksa mesayutsüla, expenditure bill shidak sayutsüla toklang tenzüker küm mememshitsüla, office- eibo shidak maru sür ita senbo shidak dang aginütsüla ta masütsülago no aji.

**Pastor** : Aya aji joko onok tama melenshitsü merangdi aser na-a melenshiang no oh Alok...

- Lilir : SMS


**TANÜBO NAI LANGZÜANG**

Q. Koba anogo NASA ajanga Lucy Spacecraft khaketa yok?  
 A.16 Oct.                      B.15 Oct.                      C.14 Oct.                      D.13 Oct.  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA** : Union Minister Anurag Thakur

**AO OSHI ANGAZÜKDAK:**  
**TANÜ ANGAZÜKTSÜBA OJANG**


**Lembak**  
 (n) yong agi atakba talemtsü (mat)  
 \* Onokbo ali nung **lembak** lemer mejanger.

**Lembang**  
 (v) sü mesüra lembak agi nembang (cover with a mat or cloth)  
 \* Onoki teti sü tajung ka agi yipten **lembanga** ayur.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

**Tepela Tasoba Anogo**



1. Tenüng : .....  
 2. Tasoba anogo: .....  
 3. Küm : .....                      4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA**

- TAOBA MAPANG OCTOBER 22 NÜ ATALOKBA KAR:**
- 1721 - Tsar Peter the Great, "All-Russian Emperor" aküm.
  - 1836 - Republic of Texas indang mezüng Tir ama Sam Houston shim.
  - 1881 - Boston Symphony Orchestra-i mezüng concert agütsü.
  - 1895 - David Belasco indang "Heart of Maryland" NYC nung saya.
  - 1897 - Alima nung mezüng 'car dealer' London nung lapok.
  - 1906 - Henry Ford ya Ford Motor Company indang mezüng President aküm.
  - 1929 - James H Scullin-i Australia sorkar tentet.
  - 1932 - Charles de Broqueville, Belgium indang premier aküm.
  - 1941 - Maxwell Anderson indang "Candle in the Wind" NYC nung sayu.
  - 1957 - Konrad Adenauer, tanaben West Germany indang Chancellor shim.
  - 1968 - Apollo 7 alimai shilang.
  - 1978 - John Paul II, Pope ama shim.

**SUDOKU # 6014                      TELANGZUBA # 6013**

	5	2		6			8			7	4	8	9	1	5	2	6	3
				8	7	3		1	2	2	6	1	4	8	3	5	9	7
3		8	1		2				9	3	5	9	2	7	6	4	8	1
				7	9	5	2			6	8	7	5	9	4	1	3	2
5		7					9			4	9	3	1	2	8	7	5	6
8		9		4	1	7	5			5	1	2	6	3	7	8	4	9
	6		4		7	8	9			1	2	4	3	5	9	6	7	8
7	8	4		3				5		8	3	5	7	6	1	9	2	4
		1		2		6				9	7	6	8	4	2	3	1	5

**OJANG LUTEP # 5559**

ENKH :

DAINYAKNG :

NGJU :

UNJGA :

GESADAHISNR :

ÜLSEN :

NGA :

NYIAK :

ZÜTENK :

TNGAJUBA :

**OJANG LUTEP TELANGZÜBA # 5558**

**YIMJI YIMJUNG ASOSHI JEMBR SAKA MEIMCHIR TSÜNGDA TEMEIM MELIRA AMAJOK**

**TAN HOPTA ATEMA - KOMA SÜLA ?**

Q. Tang amai Nagaland nung oposition telok mali ser assembly election agitsü mapang tonga arununga koma süla?

### Uttarakhand nung tzüngludak sendakba lendongnung nisung 52 süogo



October 2021 nü Uttarakhand kübok Ramnagar nung aliba Jim Corbett Park nung tzü metsünga aliba noksa nung angur.

**Dehradun/Nainital, October 21 (Agencies):** Uttarakhand state nung tzüngludak sendakba lendongnung tanü tashi nung nisung 52 süogo aser nisung pongu samar mangur, ta State Emergency Operation Centre (SEOC)-i metetdaksü.

Brihostibarnü Union home minister Amit Shah state yimtiba, Dehradun tonga aoba sülen pai tensa asadanga den külemi tayimtsü nungi tzümetsüng agi tamajungba kongshiba Nainital district nung tesem balala repranga tensa asadanga.

Nainital district nung nisung 26 asü, Champawat district

nunga tzüngludak sendakba lendongnung nisung 11 asü aser Almora district nunga nisung trok süogo. Pauri district nung nisung asem asü, Udham Singh Nagar district nung nisung ana asü aser Pithoragarh o Bageshwar na nunga nisung kaka süogo.

State tesem balala nung sepai 7,500-i kümzükba maparen inyakdar aser tesüiba anogo asem tsüngda nisung 8,000 shi ainshidakja kümzükogo.

Home minister Amit Shah den Uttarakhand Governor Lt Gen (ret) Gurmit Singh, Chief

Minister Pushkar Singh Dhama, Union Minister of State for Defence Ajay Bhatt aser state Disaster Management Minister Dhan Singh Rawat nungeri tayimtsü nungi tzümetsüng agi kongshiba tesemtem repranga tensa asadanga.

Pa Jollygrant airport-i meyipa aruba sülen chief minister aser ketdangsertem den senden amen.

Osangbenertem den jembidang Chief Minister-i, anogo asemnü tzüngludak maneni aruba ajanga sen crore 7,000 shi jenjang kiojen raksatsüogo, ta metetdaksü.

### PM Narendra Modi UN climate change senden nung adentsü

**New Delhi, Mongputeni/October 21 (Agencies):** October 31 nung tenzuka Glasgow nung ayongzükba UN climate summit nung Ato kilonser Narendra Modi adentsü, ta Brihostibarnü Environment Minister Bhpender Yadav-i sangdong ka ajanga metetdaksü.

Alima nung greenhouse gases timtiba adokdaksüba linüktem rongnung India ya jenjang tasembuba nung lir aser iba ama tongtibang senden ka nung China Tir, Xi Jinping-a adentsü asü madentsüar tang tashi nungbo mejangja.

Greenhouses gases ajemdaksütsü atema India aser China napronglai menanzük.

Interview ka nung jembidang minister-i, "Ato kilonser Glasgow-i aotsü. Climate change tebilemstü atema India-i inyaker," ta metetdaksü.

"2030 küm tashi nungbo

green energy capacity 450 GW tashi kümdaksütsü atema linüki inyakdar. Onoki renewable energy 100 GW dak tema amenokogo aser ibaji capicity dang nungi shilem 25 dak tema lir," ta pai metetdaksü.

Climate change tebilemstü atema alima tesem ajaklen linüktem aser company temi atemzuka inyaker, aser tang Glasgow nung ayongzükba senden nung itemji asadangtsü aser ozüng yanglushitsü tebilemba lir.

Hopta ka tsüngda Modi leniba nung cabinet-i COP26 senden atema senden jembitsü, ta Environment ministry nung otongdar kati metetdaksüogo.

Taoba hopta India nung economic adviser tongti, K.V. Subramanian-i, sensaker linüktemi climate change anema raraba nung yaritsü atema takar linüktemi dollar sen billion 100 dak temai yaritsüla, ta metetdakja liasü.

### India nung covid tali putet; vaccine dose cr. 100 dak tema agütsüogo

**New Delhi, October 21 (Agencies):** India nung ano coronavirus case timba küma tesüiba ghonda 24 tsüngda nisung 18,454 dak iba tashidak putetogo aser tang teshirangdakpur 1,78,831 kümogo, ta Brihostibarnü Union Health Ministry-i metetdaksü.

Tesüiba ghonda 24 tsüngda coronavirus agi shiranger 160 asü aser tang tashi nungbo iba tashidak agi nisung 4,52,811 süogo, ta Health Ministry-isa metetdaksü.

Tang teshirangdakpur 1,78,831 kümogo aser ibaji coronavirus caseload nungi shilem 0.52 lir; linük nung iba tashidak agi shiranger shilem 98.15 anepogo, ta

Brihostibarnep 8:00 ako nung Health Ministry-isa metetdaksü. Anogo ka tsüngda iba tashidakpur 733 agi timba kümogo.

Bodhbarnü samples 12,47,506 tendanga liasü aser tang tashi nung samples ajak senteper 59,57,42,218 tendangogo, ta ICMR-i metetdaksü.

Tang anogo shia coronavirus positive putetba shilem 1.48 kümogo aser hopta shia positive putetba shilem 1.34 kümogo.

Taküm January ita nung India nung coronavirus vaccine agütsü tenzükba sülen Brihostibar tashi nung vaccine dose crore 100 dak tema agütsüogo.

India nung vaccine dose

billion 1 ajungba anogo nung Ato kilonser, Narendra Modi-i, India nunger science, enterprise aser India nunger crore 130 longjemer inyakba ajanga linüki putiotsü ka yanglutetogo, ta metetdaksü.

Paisa iba alizüing tongtetba atema linük nung doctor tem, nurse tem aser healthcare workers ajak nem tenüngsang agütsü.

Iba anogomong nung Ato kilonseri Ram Manohar Lohia Hospital-a semdanga hospital ketdangsertem den jembia liasü.

India nunger tain nütsüing shilem 75 dak temai vaccine dose agiogo aser iba nungjagi shilem 31-ibo vaccine dose anaprongla agiogo.



Jammu, October 21, 2021: Tawa Jammu & Kashmir nung kiralongrartemi state balala nungi arua aayangertem aika tepsetba agi tetsübu nung aayangertem pei kidangi meyipa aotsü atema Jammu nung aliba railway station ka kima train ataba noksa nung angur.

### Priyanka-i tetsürtem nem smart-phones aser scooty agütsütsü nangzük

**Lucknow, October 21 (Agencies):** Congress Party lenir, Priyanka Gandhi Vadra-i taruba Uttar Pradesh Assembly election nung tetsürtem nem party ticket shilem 40 agütsütsü nangzükba sülen Brihostibarnü lai, Uttar Pradesh election nung party-i takok ngura class 12 nung azünger tetsür ajak nem smartphone agütsütsü aser graduate süa alir tetsür ajak nem electric scooter kaka agütsütsü, ta nangzükogo.

Priyanka Gandhi-i Hindi oshi nung twitter ajanga, "Yashi ni kaketshir tetsür kar ajurua liasü. Parnoki lesson bushitsü aser taküm kümzuka alitsü atema smartphones nungdaker ta ashi. Party manifesto committee den jembiba sülen party-i class 12 nung azünger tetsürtem nem smartphones aser graduate süa alir tetsürtem nem scooty agütsütsü lemetetogo, ta ni tepela nung sangdonger," ta metetdaksü.

Priyanka Gandhi ya Uttar Pradesh nung Congress party in-charge of party affairs lir, aser

laisa school/college azünger tetsür telok kati osangbenertem den jembidang tangokba noksa ka lemsatepa liasü.

2022 Uttar Pradesh assembly elections nung tetsür candidate shilem 40 nem party ticket agütsütsü atema Mongolbarnü party-i telemtetba agia liasü.

Linük nung state tuluba aser nütsüing timba aliba state- Uttar Pradesh election nung Congress party-i takok angutsü nükjidong nung kanga jelia maparen tenzükogo.

1951 nungi 1967 küm tashi Congress-i iba state yimsüsua liasü aser 1963 küm nung state nung tetsürtem rongnungi mezüngbuba chief minister ji Sucheta Kriplani liasü.

1967 küm UP elections nung Bharatiya Jana Sangh-i takok ngua sorkar aküm, iba sülen 1980 küm nung maneni Congress-i takok angu saka küm 8 tsüngda chief minister trok tashi shim. Iba sülen 1989 küm nungibo Congress jenjang kanga mejungi aküm.



Mumbai, October 21, 2021: India nung coronavirus vaccine agütsü tenzükba sülen Brihostibarnü vaccine dose billion 1 ajungba anogo nung Mumbai nung aliba Rajawadi hospital nung nurse tem benjungtepba noksa nung angur.



Senate nung voting rights bill ya magizükba sülen Washington nung aliba Capitol Hill nung Senate Chamber tezülen US Vice President Kamala Harris-i osangbener den jembiba mapang tangokba noksa ka yangi angur.

## Nepal tzümetsüng aser anentsüh nung asür nisung 88 jungogo

**Kathmandu, Mongputeni/Oct. 21 (Agencies):** Nepal nung tzünglu kanga sashia aruba ajanga tzümetsüng adokba aser anentsüh aluba nung Brestostibarnü tashinung nisung asür 88 jungogo. Iba anogo linük tesem balala nung nisung asüba 11 liasü, ta ketdangsürtemi ashi.

Iba lendong nungya tang tashinung nisung 30 samaogo, ta ministry indang disaster management division ajanga tang tesüsa data agütsüba nung shia lir.

Nepal anüdoklen Panchthar district nung nisung timtiba asü. Iba district nungya nisung 27 asü, iba sülen Ilam nung nisung 13 aser Doti district nunga nisung 13 asü.

Kalikot, Baitadi, Dadeldhura, Bajhang, Humla, Solukhumbu, Pyuthan, Dhankuta, Morang, Sunsari aser Udayapur densema danga district 15 nunga asüamaba

osang lir. Tesüiba anogo asem tashi tzünglu kanga sashia aruba ajanga linük tesem balala nung tzümetsüng adoka aser anentsüh aluba nung nisung 88 takum samaogo, ta health ministry ketdangsürtemi ashi.

Brestostibarnep nisung 11 asüba jangjaogo. Bodhbarnü nisung 63 asü aser Mongulbarnü nisung 14 asü, ta parnokki ashi.

Iba tzü-mopung lendong yagi Nepal indang district 20 nung kongshi. Bajhang district nung nisung 21 samar bushir. Ajisüaka Brestostibarnü nungi tzüngsang tajungba akumer, ta ketdangsürtemi ashi.

Kasa mapang home minister Balkrishna Khand-i Nepal Police, Armed Police Force, National Investigation Department aser Nepal Army dang Humla district nung bendanger raliwalir anendaka alirtem tekeraba nung

kumzüksü totuyuba agütsüogo. Kathmandu nungi anüolen tsütsü kilometre 700 shi pilar Humla district kübok Nakhla tesem nung rür kanga sashia alaba agi lenmang shibangba nung Slovenia nung raliwalir pezü aser guide asem densema nisung 12 taolen mali anendaka lir.

Parnok ya Limi nung trekking expedition ka tembanger Simikot-i meyiba shilangba mapang iba timtem ya ajuru, ta Humla Chief District Officer Ganesh Acharya-i ashi.

Iba tesem nung Deobarnü nungi rür ala tenzük aser tzüngsang majungba ajanga Bodhbarnü timtem nung alir kumzükba maparen meinyaktet.

Timtem nung alirtem kumzükba maparen inyaksü atema yangji aliba ketdangsürtemi home ministry dang helicopter ka meshir, ta ketdangsürtemi ashi.

## DRC anüdoklen aliba yimtsüngtem amak; civilian 16 tepset

**Kinshasa, Mongputeni/Oct. 21 (Agencies):** Democratic Republic of the Congo (DRC) anüdoklen lendong agütsürtemi yimtsüng asem amakba mapang civilian 16 tepset, ta monitoring group ka ajanga ashi.

Kivu Security Tracker yagi iba region nung azüdokshi asadanger, aser parnokki Brestostibarnü ashiba agi, azüdokshi ya North Kivu province nung aliba Beni region künok Mayele, Kalembo aser Toya yimtsüngtem nung aonung ataloka liasü.

"ADF dak temolung malemer," ta parnokki Twitter nung ashi. Allied Democratic Forces (ADF) armed group ya DRC indang anüdoklen arütsülen mapang talangka nungi kanga yakyaka arur.

Civil society coordinator Maleki Mulala-ibo nisung 18 asü aser aika samar bushir, ta

AFP news agency dang ashi. Khaseter rongnung tetsür pezü liasü aser mitkartemi lendong agütsür nungi nüburtem mekumzüktem, ta pai tai tongloksü.

Saka Beni region indang army odongtar Captain Antony Mualushayi-ibo, iba tesem nung ADF züngsemtem densema kiralongrar telok ka den sepaitem khatap, ta ashi.

May ita 'state of siege' tenzükba sülen North Kivu aser anasa aliba Ituri province nung civilian 944 tepsetogo, ta Kivu Security Tracker ajanga ashir, kong civilian lenirte menden aika mitkar aser police tanishirtemi atsüngdoka liasü. Iba region nung telungpur telok ter dak tema aliba samatsütsü mechi 'state of siege' ya sangdonga liasü.

August ita eastern DRC nung nisung tepsetba ya tsükchir telok

balala tsüngta raraba mapang kisüng masü saka armed forces temia tepseta lir, ta United Nations' peacekeeping mission MONUSCO ajanga taoba ita ashi.

Iba ita human rights nung aibelenba cases 739 liasü aser July ita cases 492 liasü, ta parnokki ashi.

Item tatalokba ya shilem 55 jungnüa 'agents of the state' mapa lir, aser yangji ozüng amshidang civilian 40 tepsetba dena lir, ta ashi. Tashiyim amshiba tanüngba shilem 45 ya telungpur telok balala mapa lir, aser parnokki nisung tepsetba 253 liasü, ta züngshiaka iba dang kanga agi timba lir.

"State of siege" ajanga security tensa kar tajungba kumogo saka tebilemte aika lir, ta iba mapang UN indang Joint Human Rights Office (UNJHRO) ajanga shia liasü.

## Pakistan kübok tesem balala nung sepai trok tepset

**Islamabad, Mongputeni/Oct. 21 (Agencies):** Pakistan western province nung security post ana amakba densema tesem asem nung lendong balala atalokba nung sepai trok asü, ta mitkartemi ashi, aser ibai South Asia linük nung security forces dak tenük yoker azüdokshiba rongnung tasenba alitsü.

Northwestern Bajaur district nung security forces temi Bodhbar aonung search operation ka agia alidak tenük yoker improvised explosive device (IED) ka poklokja sepai pezü asü, ta mitkar indang press wing ajanga sangdong ka nung ashi.

Asürtem rongnung ana paramilitary Frontier Corps forces züngsem liasü aser ana police officer liasü, ta sangdong ajanga ashi.

Bajaur district ya taoba mapang Federally Administered Tribal Areas (FATA) nung shilem ka lir, koba Pakistan northwestern tsütsü Afghanistan den arütsüa lir, kong Pakistan mitkartemi Pakistan Taliban aser parnok den sendaktepa alirtem den iba telok 2007 nung tentetba sülen rara arur.

2021 nung iba tesem nungya security forces aser civilian anema azüdokshiba tali akumer,

kong mejangjaba nisungtemi security check post tem amaker, patrolling party tem anasa IEDs pokloksür mesüra civilian dak tenük yoker amaker.

Bajaur south tsütsü kilometre 180 shi pilar Hangu district kübok Thal area nung lendong agütsürtemi security check post ka nung tenük yoker amak, aser iba mapang arishi küm 26 tain sepai ka asü, ta mitkartemi Bodhbarnü sangdong balaka nung ashi.

"Sepaitemi tasü ita telangzüba agütsür aser kiralongrartem den rara liasü," ta mitkar indang press wing, Inter-Services Public Relations (ISPR) ajanga ashi.

Item lendong agütsüba ya tang tashi telok katia tenüng agia mali.

Southwest tsütsü Balochistan province kübok Kech district nunga lendong agütsürtemi Bodhbarnü security check post nung injang khalokja sepai ka takum samatsü, ta mitkartemi ano sangdong danga ka nung ashi.

Iba atema telok katia tenüng agia mali, saka Balochistan nungya ethnic Baloch armed separatist movement ajanga security forces aser civilian dak tenük yoker küm ter dak tema lendong balala agüja arur.

## Barbados tir inyaksü Dame Sandra Mason shimtetogo



**Bridgetown, Mongputeni/Oct. 21 (Agencies):** Barbados linük nung Queen Elizabeth tekolakba sür aliba agiena republic akumtsü renemshiba mapang tir mezüngbuba shimtetogo.

Arishi küm 72 tain Dame Sandra Mason ya November 30 nü tenangzüktep agitsü, koba Britain nungi nüjiso ngur küm 55 ajungba anogo asütsü.

Dame Sandra ya Barbados Court of Appeals nung inyaker tetsür mezüngbuba liasü aser la ya 2018 nungi governor-general inyaka aru.

Iba linük republic jenjangi melentsü sentong ya sorkari taoba küm sangdonga liasü.

"Barbados tesüiba colonial yimyatm ajunga yutsütsü mapang tongogo," ta ashi. Iba temelenshi ya 1998 küm constitutional review kati benoka liasü.

Bodhbarnü House of Assembly aser Senate joint

session ka amenba sülen otsü yanglua election ya agi. Iba election ya linük atema terenlok tetenzükter amai liasü, ta Ato Kilonser Mia Mottley-i ashi.

Nütsüng yongsük 285,000 shi aliba Barbados ya Caribbean asetkong nung nütsüng yongsük timtiba aser yimchi-yimjung aliba linük ka lir. Mapang ka moji ayokba nung metaloker liasü saka tangbo tourism aser finance tsütsü rongsenketzüng lemsar lir.

Caribbean nung tesüiba mapang British colony aliba nungi republic akumba linükji Barbados ya mezüngbuba masü. Guyana ya Britain nungi nüjiso ngur küm pezü majungdang 1970 küm iba mera ya agia liasü. Iba sülen anidaka Trinidad and Tobago-i 1976 aser Dominica-i 1978 küm republic akum.

Tesüiba mapang Jamaica-ia iba temelenshi mera agitsü tebilemba lir, ta shia liasü.



## IPR-i 'Live Sound Management' nung training ayongzüker



Kohima, Mongputeni/October 21, 2021: Brehostibarnü, DIPR Conference Hall, Kohima nung Live Sound Management nung Intensive Crash Course training agidang, Director, Information & Public Relations, Er. Z. Tokishe Sema-i telok den jembiba noksa nung angur.

**Kohima, Mongputeni/October 21, 2021 (TYO):** Information and Public Relations Department-i Live Sound Management nung Intensive Crash Course training ayongzüka liasü. Anogo ana tashi ayonga agitsü aliba training ya Brehostibarnü (21.10.2021) tenzüksüogo aser Hokolbarnü tashi (22.10.2021) agitsü. Iba training nung shisalen sayurji Director, Pheto Music & Film Academy Dimapur, Kashito Kiba Managing Nagaland asütsü, ta sangdong ajanga metetdaksü.

Iba sentong nung, Director, Information & Public Relations, Er. Z. Tokishe Sema-i, Sorkar aser nüburtet tenzüksü maongka anguba atema pelar aser iba training ayongzüksü mapang agi sempettsüba ya maongka tulu ama agizüker, ta ashi.

Pai, iba training nung shilem agirtem dang meranga inyaksü aser pei maparen ajanga kija ajangzüka dang masü tangara tatishitsü tajung agitetsüsa inyaksüla, ta ajungshia liasü.

Maparen/tasa tasen angazüksü asoshi jangratsüla

aser pei nem nungloksüba mapa ochishia inyakba den ang khuret abenba nübu ka ka asütsüla, ta Sema-i metetdaksü.

Live Sound Management - Intensive Crash Course training indang mezüing anogo nung, live sound, live sound indang system configuration, external analogue processor aser 'corrections & configuration' indang system tem training agirtem dang metetdakja liasü.

Iba training lapokba sentong nung, Joint Director IPR, Kevizayienuo menden liasü, ta kasa sangdong nung shia lir.

## 'Haunted Mansion' nung Danny Devito denogo



**New York, Mongputeni/October 21, 2021 (Agencies):** Taruba project - 'Haunted Mansion' atema cast rongnung 'Always Sunny In Philadelphia' actor Danny Devito anisemogo. Iba film nung Danny-i Tiffany Haddish, Owen Wilson, Rosario Dawson aser LaKeith Stanfield nung den külemi shilem agitsü.

Hollywood Reporter sangdong ajanga angazükba agi, Haunted Mansion nung Danny DeVito-i professor ka ama shilem agitsü.

Iba project dak sendakba nung film yanglurtemi osang tejangja magütsü, saka tanga osang ajanga angazükba agi film ya tetsü ka aser lar jabaso ka indang otsü asütsü.

2003 küm sayaba 'Haunted Mansion' otsü nung ajemdaker project tasenba yanglutsü. Haunted Mansion (2003) nung

Eddie Murphy, Nathaniel Parker aser Jennifer Tilly nungeri tongti shilem agiogo aser taruba project atema Katie Dippold-i script zülutsütsü aser Justin Simien-i direct asütsü.

'Aladdin' film producer Dan Lin aser Jonathan Eirich nati tena meyong Rideback company ajanga iba film produce asütsü.

Iba film atema, taoba hopta Atlanta aser New Orleans nung production maparen tenzüko.

Tawa, Disney indang 'Jungle' Cruise' ajanga box office nung takok nguogo. Iba film ya nungtugu Disneyland ride - Jungle Cruise ajanga ajungmesoa yangluba film ka asütsü. Ano, 'Pirates of the Caribbean' indang franchise ya Disney theme park ajanga ajungmesoa yangluba project asütsü.

## Shahid Kapoor-i 'Bull' nung shilem agitsü

**Mumbai, Mongputeni/October 21, 2021 (Agencies):** Taruba action movie - 'Bull' nung Shahid Kapoor-i tongti shilem agitsü. Iba film nung Aditya Nimbalkar-i director ka ama mezüing inyakba angutsü. Taoba mapang pai film yanglur Vishal Bharadwaj den külemi film dak sendakba maparen balala nung yaritepa inyakogo.

Shahid-i ashiba agi, "Bull" ya Brigadier Bulsara taküm otsü nung ajemdaker yangluba action film ka asütsü. Paratrooper ka ama shilem agitsü maongka anguba atema pelar aser konang ka ama agizüker," ta ashi.

Iba otsü 1980s mapang ataloka liasü aser sangküm 2022 iba film tangok tenzüksü

asalentong yangludlar.

Bull atema Producer Bhushan Kumar-i producer Amar Butala aser Garima Mehta na den longjemtsü.

T-Series, Managing Director, Bhushan Kumar-i, 'Kabir Singh' sülen Shahid den tanaben longjemer project ka tenzüksü aser audience dang onoki otsü tajung ka sayutsü sentong lir, ta ashi.

Iba film atema Partner - Guilty By Association, Amar Butala-i, "Onoki sepaitem nem akhüm aser tetushi agütsütsü tebilemba nung iba film yanglur, shirnoki linük asoshi taküm bendanga agüja inyakogo. Iba film nung Shahid-i tongti shilem ka agitsü," ta shisem.

Garima Mehta, Partner,

Guilty By Association-i, Sepaitem bilemtetsü aser parnok nem aküm agütsütsü asoshi otsü ajanga parnoki inyakba nübur dang sayutsü maongka anguba atema pelar. Iba film ajanga India ajunga nung nübur den jembitsü imlar," ta ashi.

Gulshan Kumar aser T-Series den Guilty By Association longjemer yanglutsü aliba 'Bull' project atema Aseem Arrora aser Parveez Shaikh nati otsü aser screenplay zülutsütsü. Aditya Nimbalkar-i direct asütsü aliba film ya Bhushan Kumar, Krishan Kumar, Amar Butala aser Garima Mehta nungeri produce asütsü. Iba film sangküm 2022 nung tangok tenzüksü sentong lir.

## Security Forces-i NSCN (U) telungpur ka apu




**Dimapur, Mongputeni/October 21, 2021 (TYO):** Taoba Brehostibarnü (14.10.2021), Security Forces den Police longjemer Dimapur kübok Burma Colony - general area nung NSCN (U) indang telungpur ka apu, ta sangdong ajanga metetdaksü.

Osang tejangja ka nung ajemdaker, Security Forces den State police longjemer Burma Camp general area

mita aoba mapang NSCN (U) indang telungpur ka pua liasü. Team-i pua alisang ket nungi point 32 pistol ka den magazine ngutet.

Iba maparen dak sendakba nung maneni bushisüngdangtsü atema, pua alisang aser pa ket nungi ngutetba pistol aser magazine tem East Police Station Dimapur nung agütsüogo, ta kasa sangdong nung shia lir.

## Macnivil-i music video tasen ka sayaogo



**Dimapur, Mongputeni/October 21, 2021 (TYO):** Brehostibarnü, Macnivil-i 'Tomorrow's Not The Same' ken indang music video ka sayaogo. Iba music video nung Ket Meth aser TS Geneses na

dena lir. Macnivil indang music video tasenba ya visuals balala amshia yangluogo. Iba ken ajanga nisung ka taküm nung timtem balala ajangshia aoba aser tatem nung anisüngzüker aser

tepela anguba indang jembir.

Iba ken (Music video) ajanga nüburtet dang pei taküm nung ajangshiba tetsübu aser timtem tensa koktetsü asoshi jembitsü aser ajungmesotsü imlar, ta Macnivil-i lemsatetp.

'Tomorrow's Not The Same' indang music video ya Macnivil-i direct süogo aser cinematography tsütsü Rurpuzo Koso-i yariogo. Iba project atema Autoking aser NCL Streetwear ajanga teyari agüja liasü. Tejangrar temi iba ken ya <https://youtu.be/C00ZN0FMxRw> link nung repangettsü akok.

## Pughoboto SDPDB senden Oct 26 nü agitsü

**Dimapur, Mongputeni/October 21, 2021 (TYO):** 26 nü agitsü latetba metetdaksüogo. Iba senden ya ADC & Vice Chairman ADC Pughoboto office nung Pughoboto SDPDB, 11:00 ako nungi tenzüka agitsü. Thungchanbemo Tungoe-i SDPDB züngsem ajak dang sangdong ka ajanga, Board züngsemtem dang October ita atema SDPDB senden October

ADC Pughoboto office nung 11:00 ako nungi tenzüka agitsü. SDPDB züngsem ajak dang iba senden nung tamakok maludaksüi arua shilem agitsü, ADC-isa metetdaksüogo.

## Champions League: Man. United aser Chelsea nati takok angur



Old Trafford, Mongputeni/October 21, 2021: Champions League - Group F football asaya nung, Manchester United atema Cristiano Ronaldo-i goal tasembuba idaktsür sülen pelaba yangi noksa nung angur. Iba asaya nung Man. United-i goal 3-2 agi Atalanta kokogo.

**Old Trafford, Mongputeni/October 21, 2021**

**(Agencies):** Bodhbarnü, Old Trafford kübok Champions League Group F nung Manchester United aser Atalanta na asaya liasü. Manchester United-i Atalanta madak goal 3-2 agi takok angur, kong telok anaprongla goal 2-2 ser asaya mapang, minute 81buba nung Cristiano Ronaldo-i United atema goal tasembuba inoktsü.

Iba asaya tenzüker minute 15buba nung Mario Pasalic-i goal ka inokja Atalanta pur goal 1-0 agi United tejakdang kümamadok. Davide Zappacosta-i yokba ball agizüka Mario-i iba goal idakja liasü.

Tetoktepbä ajak nung, taoba asaya pungo nungi United-i asaya ka takok angur asütsü.

Atalanta puri corner ka metsütsü maongka angur, koba Teun Koopmeiners-i metsüloktsü aser goal post anasa Merih Demiral kolak agi tongokja minute 29buba nung telok atema goal tanabuba idaktsü.

Mezüng half matongdang, Fred aser Marcus nati goal idaktsütsü maongka tajung

tepdok, aser Atlanta pur goal 2-0 agi United tejakdang ser tembang. Ajisüaka, asaya tayonger telok - United-i tanabuba half nung goal inoktsütsü maongka angur.

Iba asaya tanabuba half tenzüker mapang tatsüka tsüngda minute 53buba nung Marcus Rashford-i United atema mezüng goal inokja liasü. Atlanta pur defence tsütsü tashimaitba asadanteta, United-i goal tanabuba inoktsütsü maongka angur, kong Harry Maguire-i goal ka idaktsü.

Goal 2-2 ser asaya mapang, Luke Shaw-i Atalanta goal tsütsü cross ball ka metsüloktsü, koba Ronaldo-i juka tur pa kolak agi ball dak tongokja United atema goal tasembuba bendenloktsü.

Iba League nung, United pur asaya asem sülen point 6 ngutetta group nung temaba jenjang tongtetogo. Kasa group nung Atalanta aser Villarreal naprongla point anana agi United tesülen lir.

Kasa asayamung Group E nung, Bayern Munich-i Benfica madak goal 4-0 agi takok angur. Iba asaya nung, L. Sane-i goal 2 aser Robert

Lewandowski goal ka idaktsü. Tia makai, Everton-i par telok after- Benfica indang nung goal ka idaktsü.

Group H nung, Chelsea-i goal 4-0 agi Sweden indang club - Malmo kokogo. Iba Champions League nung, Chelsea atema Andreas Christensen aser Kai Havertz nati goal ka ka idaktsü; aser Jorginho-i penalty ana tashi inokja liasü

Group E nung, Barcelona-i goal 1-0 agi Dynamo Kyiv kokogo. Iba asaya nung Pique-i Barcelona atema goal ka idaktsü. Arishi küm 34 tain Gerard Piqué-i Champions League goal 16buba idaktsür asütsü. Iba League nung, asaya pungo tashi tamakok ngur sülen, Barcelona-i iba asaya takok angur asütsü.

Kasa asayamung, Group G nung Salzburg-i Wolfsburg madak goal 3-1 agi kokogo. Iba asaya tenzükli minute 3buba nung Germany nung asayar tasen aser forward Karim Adeyemi-i goal ka idaktsü aser tanabuba half nung Switzerland nung winger arishi küm 21 tain Noah Okafor-i goal ana tashi bendenloktsü.

## Denmark Open: PV Sindhu quarter-final-i iogo



**Odense, Mongputeni/October 21, 2021**

**(Agencies):** Brehostibarnü, Denmark Open Super 1000 tournament asayamung tetsür kija round of 16 asaya nung, Olympic medal anaben takok angur PV Sindhu-i Thailand tsür Busanan madak takok ngua iba asayamung

quarter final tongogo.

Iba asaya nung, Sindhu-i 21-16, 12-21, 21-15 agi Busanan Ongbamrunphan tsükdaktsü.

Taküm August ita, Tokyo Olympics nung Sindhu-i bronze medal takok anguba sülen, Denmark Open nung lai mezüng shilem agir asütsü.

India indang Olympic asayar takotet rongnung Sindhu ka asütsü aser lai iba asayamung nung shilem magidang, Tokyo Olympics temer sülen, la mapang tatsüka anisüngzüka aser temang anepalua liasü.

Iba badminton asayamung nung, India nung badminton asayar rongnung London Olympic bronze medal angur Saina Nehwal aser taoba mapang men's world No. 1 Kidambi Srikanth na dena lir.

Kasa asayamung tebur kija round of 16 asaya nung India nung Srikanth-i 21-23, 9-21 agi Japan nung Kento Momota makokba sülen, pa iba asayamung nungi tukadokogo.

## 21buba NSF Martyrs Memorial Trophy

- Hokolbar (22.10.2021) atema asaya yamai alitsü:

1. Mele FC vs Khuzama United FC @ 12:30 PM
2. Kitsuobozou Youth Society vs Gaziphema FC @ 2:00 PM

## Tanü nungi Inter-departmental Badminton asayatsü

**Kohima, Mongputeni/October 21, 2021 (TYO):** 1buba Inter-departmental Badminton Tournament ya Hokolbar (22.10.2021) nikongdang 3:00 ako nungi Nagaland Legislative Assembly Multi-purpose Hall, Kohima nung tenzütsü terenemba lir, ta sangdong ajanga metetdaksü.

Inter-departmental Badminton asayamung lapokba sentong nung alakteta tejaoker ama Minister for Planning & Coordination, Land Revenue and Parliamentary Affairs, Neiba Kronu aruagi adentsü. Iba sentong nung,

Convener, IDBC, Shanavas C, IAS-i, Inter departmental Badminton indang metetdaksüdü aser telok pela agizütsü. Kasa sentong nung, alakteta tejaoker Kronu-i o jembitsü aser iba sülen, T Imtisungit Ao-i asayamung nung shilem agitsüpur team team tem telok dang metetdaksütsü. Iba sentong nung Kekhriesetuo Ziephru menden asütsü.

Inter-departmental Badminton asayamung ya Inter Department Badminton Club, Kohima ajanga ayongzüker, ta kasa sangdong ajanga metetdaksü.

## Bajrang Punia-i Senior Nationals nung shilem magitsü



**New Delhi, Mongputeni/October 21, 2021**

**(Agencies):** Temekok yirur aliba nungi taneptsü anguba sülen, Tokyo Olympics bronze medal angur, wrestler Bajrang Punia-i training tenzükgogo. Ajisüaka, sangküm 2022 asayamung balala atema renemshitsü tebilemba nung, pai Senior Nationals asayamung nung shilem magitsü lemtet.

Taküm Tokyo Olympics metenzükdang, arishi küm 27 tain Bajrang temekok yirua liasü, saka pai iba timtem arema Games nung shilem agi aser 65kg category nung pai freestyle bronze medal takok angur.

Tokyo Games temer, hopta trok tashi temang anepalua anisüngzüksü asoshi teyuba sülen tan ita World Championships nung pai shilem magitet.

"Kü temekok tang tajungba lir. Testüiba anogo ana nungi ni training agi tenzükgogo. Ni tajungba lir saka taküm asayamung ka nung danga shilem magitsü. Sangküm atema renemshitsü asoshi taküm National asayamung nung

masayatsü," ta Bajrang-i ashi. Ajisüaka, sangküm asayamung balala nung shilem agitsü dak sendakba nung Bajrang-i telangzüba ka magütsü.

"Tang tashibo telemtetba tajung ka agia mali. Ajisüaka, taküm tetoktepbä asayamung ka nung danga ni shilem magitsü aser aji tejangja. Sangküm asayamung atema tang nungi tenzüka renemtsü tebilemba lir," ta pai ashi.

Aruya aliba Senior Wrestling Nationals asayamung ya November 19 nungi 21, 2021 tashi Gonda, Uttar Pradesh nung asayatsü.

Georgia nung Shako Bentinidis, shiba Bajrang indang coach lir, pa den longjemtsü asoshi yongyar, saka Bajrang-i ashiba agi, coach Shako den tanaben külemi inyaksü asoshi Wrestling Federation of India telemtetba dak dang keta lir.

"WFI telemtetba nung anidaktsü mulunga dang lir. Coach Shako den külemi inyaker, saka WFI ajanga telangzüba ka agütsütsü. WFI-i kechi lemtetdir, iba nung ni anidaktsü mulunga dang lir," ta pai ashi.

## BILEMDANGANG

"Yimkongi molungba maparen nung kijai tekong temerang."